

湖南褒忠录初稿

湖南褒忠錄初稟

殉貞一

長沙府

長沙

錢氏江蘇丹徒人長沙舉人陳洪鈞繼室知書明大義撫前室
子女如已出洪鈞官新田教諭錢氏偕行咸豐四年冬洪鈞以
俸滿驗看挈眷赴會城時郴桂土匪蠭起抵桂陽州松木墟突
遇賊洪鈞被縛錢氏暨諸子女稍後聞之遽置乳子於途揮子
女遠避躬率前長子庠生覲元奔賊所賊挾洪鈞急走錢氏泣
隨行至山塘適遇前次女抱乳子至錢氏曰汝父生死莫卜吾
與汝相從於死毋辱賊也女泣曰如此呱呱何錢氏遂指女謂

觀元曰以付汝可速行俄而賊至錢氏大罵投池死適賊爭攫輜重洪鈞乘間逃子女皆免前次子庠生恩沃募勇護喪歸葬長沙

劉氏名玉英諸生蕭兆錡妻咸豐四年二月湖北賊竄長沙靖港近兆錡鄉賊十餘人闖入兆錡舍家人未及避而門外競呼水陸官軍至賊遽遁三月賊復踞靖港分竄湘潭兆錡挈家人走避善邑古冲六坡湘潭賊敗由間道還靖港道經六坡兆錡急掖母挈氏與子女匿叢莽間賊執鎗穿林呼殺家人駭走兆錡與母相失母仆地氏急扶之哭已而賊竟去日暮返舍突有賊數人持矛撞門入急呼具炊烝獰無人狀氏泣謂姑曰賊狀

如此兒輩詎有生理耶乘賊食次負幼子投塘死時四月五日也明日賊遁兆錡募眾堵捕獲二賊手刃之

周氏文生鄭先械妻咸豐六年五月十五日賊竄入境突至其宅先械因罵賊被害周氏因夫遇害慟哭大罵且拾物擊賊賊怒斷其首

朱氏葉敬原妻侯氏葉明耀妻咸豐四年四月賊由湘潭敗走靖港初六日賊經其境二氏相率匿山中賊踞其宅旋搜山見之迫使歸朱氏不從投井侯氏攜一子繼之皆死

彭氏聶庭芳妻庭芳貿易湘潭彭氏偕往咸豐四年三月二十八日賊竄湘潭庭芳聞賊逼近送氏歸長沙甫抵家訛傳庭芳

被殺氏是夜自縊庭芳尋歸

鍾氏職員曹華臣妻咸豐四年三月二十九日賊回竄靖港逼新康圍氏適孕不能逃賊至攜女投水死

張氏陳銓文妻寄居常德夫故守節咸豐四年常德郡城被陷攜女幼姑赴水死

劉氏童淦妻隨夫僑居湖北省城巡道嶺咸豐二年十二月粵賊陷武昌與夫同時自盡妾陳氏子和林子婦韓氏皆殉

陳氏朱振鏞妻僑居湖北省城火星堂城陷投湖死

黃氏夫名不詳湖北候補府經歷縣丞王誥僕婦從寓湖北省城廣福坊城陷投井死

何氏黃子政妻年三十二咸豐四年三月粵匪入境氏攜幼子投水死

倪氏劉全義孀妻咸豐四年粵賊入境氏衰弱不能逃投水死年四十二

曹氏文曉軒妻隨夫僑居漢陽咸豐五年漢陽被陷曉軒遇害氏慟哭自盡

范氏李惇五妻隨夫僑寓杭州城陷遇害

善化

張氏戶部主事舉人畢大琛妻知大義咸豐二年夏粵賊犯楚大琛時留都門聞警南旋七月中旬抵省門而賊已由郴州竄

永興茶陵省城戒嚴一日氏手釵珥並參苓數端授大琛曰賊至吾輩萬無生理君持此自保毋以妾爲慮越三日賊突至南門郭外火光燭天至夜分有疾走大呼門外者曰城陷矣大琛出偵知爲訛言遽返則氏已投繯室中矣解之氣絕七月二十八日也

金氏徐立朝妻家貧早孀撫遺孤三皆成立次子霖娶妻王生子光綬已而兄弟相繼逝徐氏一門僅兩寡婦一孤孫咸豐二年粵賊竄陷郴桂長沙戒嚴徐氏偕戚某避亂武昌已而賊攻武昌至十二月初四日城被陷金氏自縊死王氏就縊帛絕再縊氣絕光綬三縊帛絕不果死賊入室光綬被擄賊刦之行至

湖口遇戚伍氏僕偕宵遁得脫間關抵鄂乃扶金氏王氏櫬歸葬長沙

張氏瀏陽人善化從九品葉紳妻咸豐元年紳挈張氏及適鄭姓女隨兄國華姪諸生善敦善政展墓湖北寓武昌城中明年十二月粵賊犯武昌城被陷國華與紳皆自盡張氏遽呼女登樓相對投繯死善敦妻楊氏善政妻柳氏皆夫婦同自縊而死紳妾熊氏獨攜兩幼子恩榮春榮匿室暗樓中免咸豐四年湖北巡撫採訪彙奏張氏及女並姪婦楊氏柳氏均蒙卹典後女夫鄭光杞援例爲知縣署陝西南縣事再以妻葉氏殉節事白於上憲奏上得

旨旌表如例

陳氏副榜張禮度妻事姑王氏孝道光三十年禮度由教職改府經縣丞分發貴州挈眷之任咸豐五年七月禮度丁父憂扶櫬還楚至錦屏烽烟相望不能行遂止寓錦屏城外民房禮度旋奉委辦理台拱軍務六年正月戰死八貢墟賊偵知家屬寓錦屏城外糾黨出不意往搜姑王氏投水死陳氏指賊大罵遂遇害同時親屬十四人皆殉

楊氏許某妻浙江試用知縣楊然敬之女隨夫至浙江省父咸豐十年然敬權湖州通判明年湖州被圍又明年五月城陷然敬適巡徽北門聞變遽回寓手刃其妾呼女至前曰城破矣汝

輩可從吾九原毋爲賊辱也時女僅一子名湖生甫周晬女遽抱子投水死

郭氏未入流周汝明妻諸氏周取新妻咸豐二年周汝翼以同知於湖北候補是年十二月初四日粵賊陷武昌汝翼及長子取新殉難郭氏諸氏均投水死

夏氏章梓妻咸豐二年粵賊犯長沙章氏避亂於武昌已而賊竄武昌十二月初四日城陷夏氏及子婦姚氏姪孫女秋魁皆自縊夏年四十二姚氏奏熙妻年二十一秋魁前任直隸居庸關稅課大使奏勳女年十八

譚氏名彤斐監生鄒而暎妻居白田鋪咸豐四年賊撲湘潭擾

及境譚氏畏賊逼自刎而死年二十四

蕭氏庠生黃再興妻咸豐二年隨夫避難於常德四年常德城陷自縊死

湘陰

宣氏江西人會同訓導傅安宗長子某妻梁氏會同人四子錦儒妻咸豐三年安宗選授會同訓導二氏皆成婚任所十一年十月翼逆石達開由潯州間道入楚會同戒嚴賊進據縣屬東山四出焚掠安宗率團勇防堵次安順溪七日賊竄會同十九日城陷安宗聞變遽回城與次子嘉桂及錦儒皆遇害家人皆逃宣氏以艱行獨止賊至逼之大罵被殺梁氏方乳其幼子聞

變遽棄子自縊未絕而賊至解其懸抱其子以好語誘之梁氏
哭罵賊稍旁顧遽取刀自刎而死宣氏時年二十四梁氏年十
九

周淑媛祥景女何家塘人年十六未字咸豐四年三月十六日
被賊追逼投田泥中賊以手援之不聽以刀脅之亦不聽賊刃
之右手足皆傷賊退輿歸而死翁氏夢桃女咸豐六年五月初旬賊竄湘陰夢桃被擄賊將刦
之行女力持不捨痛哭大罵遂被殺夢桃妾亦被戕傅氏周長青妻何氏黃道誥妻咸豐六年五月賊至被逼大罵
不從而死

黃氏陳照美母年八十二罵賊而死

瀏陽

羅氏武如卓妻咸豐六年五月十六日通城賊掩至抱小兒倉皇匿巖間一賊登巖將犯之氏罵曰賊敢爾賊脅以刃肩肘均見血復大罵賊釋刃誘之氏急投巖破腦折肢而死賊怒蹴兒隨墮明日賊去或聞巖半兒啼緣而視則兒止叢翳中無恙氏年二十二歸殮顏色如生

劉氏鄧之馨妻吳氏姪孫鄧時茂妻西鄉人咸豐六年五月十八日賊竄西鄉之馨弟輝德殺賊殉難劉氏吳氏與鄧日省女一貞同時遇害劉年六十四吳年十八一貞年二十

朱氏游道材妻賊竄劉陽氏命子德潤載物先行自率媳與諸
孫繼至爲賊所迫投水死德潤妻高氏抱小兒偕二女榮秀慈
秀相從投水死朱氏年六十二高氏年三十五榮秀年十六慈
秀年十四

游五秀游道柏女年十八與游興明女賊至相隨投水死興明
女年十五

陳氏李千根妻賊至倉卒出避恐遇賊投水死年十九

周氏高丹桂妻賊至懼污投塘未死而賊退將出水聞賊回竄
復沒水死年十八

劉氏陳德山妻賊至投水死年五十二

陳氏羅之煥妻賊至隨母劉氏赴水死年二十二

高氏何清德妻年三十四周氏朱壽田妻年三十聶氏武本善妻年三十六均赴水死

暨氏沈道明妻賊至隨姑出避以身有孕懼賊追及赴水死年

二十

羅氏武儒作妻賊至出避賊踵至懼辱投崖裂腦而死年三十

二

陳氏武雲祥妻賊至爲所獲給賊出汲投河而死女坤秀亦相

從死陳氏年三十八

高氏李景讓母罵賊被害年九十

廖氏鍾兆成妻賊至二子仁安仁美被擄屋被焚憤極投火死
年八十七

朱氏董賢旺妻賊竄入境懼辱投水死

高氏李某妻北鄉人年八十七庠生李文蔚曾祖母賊竄瀏陽
村人皆避氏以年老不肯行賊至刼掠一空並擄孫曾以行氏
大罵賊以刃脅之愈罵賊斫其左右臂流血遍體須臾氣絕

金氏羅華教妻陳氏羅富萼妻王氏羅華藻妻及羅蘋藻女梅
英於賊至時均相從投水死

黎氏從九職李枝瀾繼妻同治六年縣齋匪滋事枝瀾被害黎
氏抱屍痛哭罵賊賊怒刀矛齊下身無完膚登時斃命